

Lescha davart l'armonisaziun da la finanziaziun dal turissem (LAFT)

dals ...

Il cussegl grond dal chantun Grischun,

sa basond sin ils art. 31 e 94 da la constituziun chantunala, suenter avair gi' invista da la missiva da la regenza dals ...,

concluda:

I. Disposiziuns generalas

Art. 1

¹ La lescha serve a finanziar il svilup ed il marketing intermanaschial dal turissem en las vischnancas cun l'intent da garantir e da megliar la competitividad dal turissem grischun. Intent

² La lescha regla ils princips che las vischnancas ston observar tar l'incassament d'ina taxa turistica.

Art. 2

Noziuns che vegnan duvradas en questa lescha e che han ina impurtanza speziala vegnan definidas en l'aggiunta I. Noziuns

II. Organisaziun turistica

Art. 3

¹ Organisaziuns turisticas procuran per il svilup turistic e per il marketing turistic d'ina tscherta regiun. Tar lur incumbensas tutgan oravant tut: Organisaziuns turisticas

- a) il manaschament complessiv da products e dal turissem;
- b) l'elavuraziun dal martgà orientada a la vendita en Svizra ed a l'exteriur, e quai en coordinaziun cun Grischun vacanzas, cun Svizra turissem sco er cun autras intermediaturas e cun auters intermediaturs da vendita sco interpresas da viadis e manaschis sumegliants;
- c) il controllung dal marketing e la promoziun dal manaschament da qualitat;
- d) il svilup e la concepziun da purschidas turisticas en coordinaziun cun furnituras e cun furniturs da prestaziuns locals sco alloschadras ed alloschaders, telefericas ed instituziuns sumegliantas;

- e) la garanzia ch'ils giasts vegnian infurmads ed assistids sin plaun local en collavuraziun cun furnituras e cun furniturs da prestaziuns turisticas;
- f) la fixaziun e la coordinaziun da la repartiziun da las incumbensas turisticas cun las vischnancas entaifer ina regiun turistica, en spezial concernent il svilup ed il mantegniment da l'infrastructura turistica.

² Las organisaziuns turisticas s'accordan cun las vischnancas davart la repartiziun concreta da las incumbensas e davart l'intent per duvrar ils meds finanzials che vegnan surlaschads ad ellas da vart da las vischnancas.

³ Las organisaziuns turisticas ston garantir in adempliment cunvegnent da las incumbensas ed in'organisaziun adequata, en spezial areguard la structura, la grondezza, la direcziun, la concepziun dals products, l'elavuraziun dal martgà, la vendita ed il controlling.

⁴ L'autorità chantunala cumpetenta decida:

- a) sch'ina organisaziun turistica ademplescha en il cas singul ils criteris che vegnan numnads da la lescha; sco er
- b) en cas, nua che las organisaziuns turisticas e las vischnancas na cuntanschan nagina accordanza davart la repartiziun da las incumbensas e davart l'intent per duvrar ils meds finanzials en il senn da l'alea 2.

⁵ La renga fixescha las regiuns turisticas tenor l'alea 1.

Art. 4

Vischnancas ed organisaziuns turisticas

¹ Vischnancas pon s'associar ad in'organisaziun turistica en il senn da l'artitgel 3 e da l'aggiunta I e delegar a quella il svilup sco er il marketing intermanaschial dal turissem en la regiun correspundenta.

² Grazia a l'associaziun e grazia a la delegaziun da las incumbensas en il senn da l'alea 1 s'obligheschan las vischnancas da garantir ina finanziaziun adequata da las organisaziuns turisticas incumbensadas.

³ Sco adequata en il senn da l'alea 2 vala ina finanziaziun che pussibilitescha a las organisaziuns turisticas d'ademplir en moda efectiva lur incumbensas per augmentar la cumpetitivitad dal turissem grischun a norma da l'artitgel 3 e da l'aggiunta I litera f.

⁴ Per la finanziaziun en il senn da l'alea 2 pon las vischnancas duvrar en spezial meds finanzials fiscals generals, retgavs da la facultad finanziaria, ils gudogns dals instituts statals e d'interpresas maschadadas sco er retgavs da la taxa turistica.

⁵ Ils meds finanzials en il senn dals alineas 2 e 3 che vegnan duvrads d'ina organisaziun turistica vegnan repartids sin las vischnancas associadas en la relaziun dal dumber da pernottaziuns annualas.

Art. 5

¹ Sch'i mancan las structuraz cumpetitivas ed ina repartiziun da las incumbensas cunvegna per il svilup dal turissem sco er per il marketing intermanaschial en ina tsherta regiun turistica, po la regenza obligar las vischnancas da questa regiun da s'associar ad in'organisaziun turistica entaifer in tshert termin e da delegar a quella las incumbensas en il senn da l'artitgel 4 alinea 1.

Associazium
obligatorica

² Cun prender sia decisiun resguarda la regenza la dependenza dal turissem da las vischnancas e da las regiuns turisticas pertutgadas. Determinond la dependenza dal turissem ston en spezial vegnir resguardads:

- a) la valorisaziun turistica da la regiun turistica;
- b) il dumber da plazzas da lavur che vegnan chaschunadas dal turissem e la dependenza dal turissem da las interpresas en las vischnancas u en la regiun;
- c) la relaziun da las pernottaziuns respectivamain la capacita d'alloschament cun il dumber d'abitantas e d'abitants; sco er
- d) la dependenza dal turissem da las vischnancas vischinas en la regiun turistica.

³ Sch'il termin da l'alinea 1 è scadi, vegn la lescha qua avant maun applitgada directamain, sch'il dretg communal la cuntradi. La regenza relascha provisoricamain las prescripziuns necessarias.

III. Taxa turistica**1. SUVERANITAD FISCALA****Art. 6**

¹ Vischnancas politicas pon incassar ina taxa turistica, sch'ellas èn associadas ad in'organisaziun turistica en il senn da l'artitgel 4. L'incassament d'autras taglias turisticas spezialas (taxas da cura, taxas per promover il turissem e taxas sumegliantas) u da taxas spezialas tras las vischnancas è exclus. Quai vala er per vischnancas che n'èn betg associadas ad in'organisaziun turistica e che n'incasseschan betg ina taxa turistica.

Suveranitat
fiscala da las
vischnancas

² Sch'ina vischnanca incassescha ina taxa turistica, sto ella observar ils princips da la lescha qua avant maun. Uschenavant che questa lescha na cuntogna nagina regulaziun, vala il dretg communal per concepì ina taxa turistica. En lur leschas davart la taxa turistica ston las vischnancas renviar a las disposiziuns da la legislaziun chantunala da taglia, nun che questas leschas cuntognian in urden definitiv.

³ La vischnanca regla ils princips da l'incassament da la taxa, las competenzas ed il termin da pajament en ina lescha en il senn formal. Questa lescha sto vegnir approvada da la regenza cun effect constitutiv.

2. OBLIGAZIUN DA PAJAR LA TAXA TURISTICA

Art. 7

Subjects ch'èn obligads da pajar la taxa

Obligadas da pajar la taxa turistica èn las instituziuns che profitan directamain u indirectamain dal turissem, numnadamain:

- a) interpresas che stattan datiers dal turissem;
- b) interpresas d'alloschament;
- c) persunas che na vivan betg da l'alloschament;
- d) persunas che dovran sezzas lur abitaziun sco er lur confamigliaras e lur confamigliars.

Art. 8

Excepziuns

¹ Da la taxa turistica pon vegnir deliberads mo:

- a) organisaziuns turisticas sco er l'uniun "Grischun vacanzas";
- b) persunas che dovran sezzas lur abitaziuns che sa chattan sin bains immobigliars che n'èn betg averts areguard l'infrastructura, en spezial chamonas d'acla, chamonas da chatscha, chamonas da protecziun ed objects sumegliants;
- c) subjects ch'èn obligads da pajar la taxa turistica, ch'èn exceptads da las taglias directas, uschenavant ch'els na stattan betg – pervia d'ina activitad d'interpresa – sin il martgà en concorrenza cun purschidas e cun purschiders privats.

² Sunter avair tadlà las organisaziuns turisticas u auters circuls interessads po la vischnanca permetter ulteriuras excepziuns. Talas excepziuns pon vegnir concedidas en spezial a subjects ch'èn obligads da pajar la taxa turistica, che vegnan impedids considerablamain en lur svilup economic pervia da lur capacitad economica fitg pitschna.

3. OBJECT TAXÀ

Art. 9

Gudogn turistic

L'object che vegn engrevgià da la taxa turistica è il gudogn turistic direct u indirect.

4. BASA DA CALCULAZIUN

Art. 10

Princips da calculaziun

¹ La taxa turistica sto vegnir calculada en moda variabla.

² Las vischnancas pon introducir supplementarmain ina pauschala da basa fixa per mintga persuna ch'è obligada da pajar la taxa.

³ La dimensiun da l'obligaziun da pajar la taxa sto sa drizzar tenor ils principis dal dretg chantunal ed interchantunal sco er internaziunal davart l'imposiziun dubla da taglia.

⁴ En cas dals subjects ch'èn obligads da pajar la taxa e dals quals ils retgavs d'export effectueschan in gudogn turistic pli pitschen, sto la basa da calculaziun vegnir reducida adequatamain.

Art. 11

¹ La part variabla da la taxa turistica sto vegnir incassada en applicaziun da Part variabla las suandantas basas da calculaziun:

- a) per interpresas che stattan datiers dal turissem:
a norma da la summa dals salaris tenor la AVS respectivamain da l'entrada ch'è suttamessa a la AVS¹;
- b) per interpresas d'alloschament:
a norma da la summa totala dals salaris tenor la AVS respectivamain da l'entrada totala ch'è suttamessa a la AVS² sco er – en moda cumulativa – a norma da la surfatscha d'abitar netta (gestiunarias e gestiunaris professionals d'abitaziuns da vacanzas), dal dumber da las chombras da giasts (hotels, albierts per la giuventetgna), dal dumber da las plazzas da durmir (alloschis per gruppas) u da las parcelas che sa chattan en la vischnanca (campadis);
- c) per persunas che na vivan betg da l'alloschament:
a norma dal dumber da chombras da giasts che servan ad intents da vacanzas u da recreaziun;
- d) per persunas che dovran sezzas lur abitaziun:
a norma da la surfatscha d'abitar netta dal spazi d'abitar che sa chatta en la vischnanca e che serva ad intents da vacanzas u da recreaziun.

² En lur legislaziun ston las vischnancas tegnair quint adequatamain da models da fatschenta spezial (outsourcing u chaussas sumegliantas).

5. TARIFFAS DA TAXA

Art. 12

¹ La fixaziun da las tariffas da taxa e dals imports ch'èn deliberads da la Fixaziun da las tariffas da taxa taxa è chaussa da las vischnancas.

¹ art. 5 e 9 LAVS, CS 831.10

² art. 5 e 9 LAVS, CS 831.10

² Fixond las tariffas da taxa sto en emprima lingia vegnir tegnì quint dal princip da l'avantatg/dal gudogn sco er – en moda adequata – dal princip da la capacitat.

³ En cas d'interpresas che stattan datiers dal turissem e d'interpresas d'alloschament ston las tariffas per la part variabla da la taxa turistica vegnir fixadas per branscha. La classificaziun en branschas dals subjects ch'èn obligads da pajar la taxa turistica sto vegnir fatga tenor la tabella da branschas da l'aggiunta II.

⁴ Las tariffas da taxa ston vegnir fixadas per gener d'alloschament tenor l'aggiunta III en cas da:

- a) persunas che dovràn sezzas lur abitaziun; sco er
- b) interpresas d'alloschament e persunas che na vivan betg da l'alloschament per lur taxa turistica supplementara en il senn da l'artitgel 11 alinea 1 litera b.

⁵ En cas motivads che concernan la classificaziun en branschas ed en gener d'alloschament che vegn prescritta en ils alineas 3 e 4 po l'autorità chantunala cumpetenta permetter excepziuns.

⁶ A norma dals principis da l'alineia 2 ston:

- a) las interpresas d'alloschament vegnir engrevgiadas pli fitg che persunas che na vivan betg da l'alloschament; sco er
- b) las tariffas da taxa – en cas da persunas che dovràn sezzas lur abitaziun – vegnir calculadas sin basa d'ina media adequata da pernottaziuns.

6. INTENT FIX D'UTILISAZIUN

Art. 13

Intent fix en l'interess dals subjects ch'èn obligads da pajar la taxa turistica

¹ Sunter la deducziun dals custs d'execuziun duai il retgav net da la taxa turistica vegnir duvrà per finanziair las expensas en l'interess e per il bain dals subjects ch'èn obligads da pajar la taxa turistica. El na dastga betg vegnir duvrà per finanziair incumbensas ordinarias da la vischnanca.

² En l'interess e per il bain d'interpresas che stattan datiers dal turissem, d'interpresas d'alloschament sco er da persunas che na vivan betg da l'alloschament vegnan fatgas en spezial expensas per finanziair il marketing turistic.

³ En l'interess e per il bain da persunas che dovràn sezzas lur abitaziun vegnan fatgas en spezial expensas per finanziair il svilup turistic. Latiers tutgan en spezial la planisaziun, il svilup, la construcziun e la gestiun da purschidas turisticas (infrastructuras e servetschs) al lieu.

⁴ L'utilisaziun da la taxa turistica vala sco expensa liada en il senn dal referendum da finanzas.

7. TAXAZIUN ED INCASSAMENT

Art. 14

¹ La perioda da pajament e da taxaziun è l'onn chalendar, la perioda da validaziun è l'onn precedent (validaziun prenumerando). I sto vegnir tegnì quint adequatamain d'exceptziuns, en spezial pervia da novas entradas en l'obligaziun da pajar la taxa. Principis

² Las vischnancas èn libras da fixar – en divergenza da l'alea 1 – l'onn chalendar sco perioda da pajament e da validaziun. La taxaziun e l'incassament da la taxa turistica vegnan fatgs en quest cas l'onn suandant (validaziun postnumerando).

Art. 15

Las vischnancas fixeschan las autoritads executivas. Ellas pon delegar l'execuziun, en spezial l'incassament, en ina lescha formala ad in'organisaziun adequata. Autoritads executivas

Art. 16

¹ Ils subjects ch'èn obligads da pajar la taxa turistica han da dar als posts ch'èn incumbensads cun l'execuziun da la taxa turistica gratuitamain las infurmaziuns ch'èn necessarias per eruir la taxa e da conceder ils dretgs da prender invista dals documents correspundents. Retschertga ed eruida da las datas per far la taxaziun

² En spezial han ils subjects ch'èn obligads da pajar la taxa turistica da cooperar tar la retschertga e tar l'eruida da la basa da calculaziun che pertutga els sco er d'ulteriuras datas ch'èn relevantas per calcular la taxa.

³ Il post d'execuziun cumpetent po far al lieu las retschertgas e las controllas ch'èn necessarias per fixar legalmain la taxa turistica tar ils subjects ch'èn obligads da la pajar.

⁴ Per retschertgar las datas da persunas e d'objects ch'èn relevantas per calcular la taxa turistica po il post d'execuziun cumpetent duvrrar las datas da las suandantas autoritads e dals suandants registers:

- a) register da taglia;
- b) register d'abitantas e d'abitants;
- c) register dals objects da las vischnancas.

L'access a las datas po vegnir fatg tras la procedura d'invista.

Art. 17

La basa da calculaziun e las ulteriuras datas ch'èn relevantas per calcular la taxa turistica ston vegnir communitgadas tras la vischnanca u – en cas d'ina delegaziun – tras l'organisaziun d'execuziun cumpetenta als subjects ch'èn obligads da la pajar, e quai cun la decisiun da taxaziun. Communicaziun

Art. 18
Valitaziun temporal
En cas da la valitaziun temporal da la taxa turistica stoi numnadamain vegnir tegnì quint dals princips d'incassar la taxa turistica a norma dal gudogn turistic, da la capaciad economica sco er da la practicabladad.

Art. 19
Taxaziun d'uffizi
L'autoridad communal cumpetenta po far – sut las premissas da l'artitgel 131 LT – ina taxaziun d'uffizi.

Art. 20
Relasch
¹ Sche la persuna ch'è obligada da pajar la taxa turistica è vegnida en miseria u sch'il pajament da l'import debità muntass per ella per auters motifs ina gronda direzza, po l'autoridad communal cumpetenta relaschar ils custs u las multas totalmain u parzialmain.

8. ULTERIURAS DISPOSIZIUNS

Art. 21
Meds legals
¹ Cunter disposiziuns da l'autoridad communal cumpetenta u da l'organisaziun d'execuziun cumpetenta poi vegnir fatg protesta en scrit tar il post che ha disponì, e quai entaifer 30 dis dapi la comunicaziun.
² Cunter decisiuns da protesta poi vegnir fatg recurs en scrit tar la dretgira administrativa, e quai entaifer 30 dis dapi la comunicaziun.

Art. 22
Disposiziuns penals
Per far valair lur leschas davart la taxa turistica relaschan las vischnancas las disposiziuns penals necessarias.

Art. 23
Surveglianza
¹ L'autoridad chantunala cumpetenta surveglia l'execuziun da la lescha qua avant maun.
² Las vischnancas ed ils ulteriurs posts ch'èn occupads cun l'execuziun da questa lescha ston conceder a l'autoridad chantunala cumpetenta l'invista da las actas e dar las infurmaziuns necessarias per che quella possa ademplir sia funcziun da surveglianza.
³ Las vischnancas ston vegnir tadladas periodicamain da l'autoridad chantunala cumpetenta en quai che concerna l'adempliment da las incumbensas tras las organisaziuns turisticas. L'autoridad chantunala cumpetenta po obligar las vischnancas d'introducì ina controlla da l'effect adequata.

IV. Disposiziuns finalas

Art. 24

¹ Sche questa lescha è entrada en vigur, han las vischnancas 1 onn temp per abolir lur legislaziun davart las taxas da cura, davart las taxas per promover il turissem e davart chaussas sumegliantas e da la remplazzar, sche quai è necessari, tras relaschs correspundents davart la taxa turistica en il senn da questa lescha.

Adattaziun da la
legislaziun

² Ils meds finansials che derivan da las taxas da cura, da las taxas per promover il turissem e da chaussas sumegliantas ston vegnir mess a disposiziun a las organisaziuns turisticas gia durant il temp transitoric da l'alea 1 en il senn da l'artitgel 4.

Art. 25

¹ 1 onn suenter l'entrada en vigur da la lescha qua avant maun vegn la lescha qua sutvart midada sco suonda:

Midada dal dretg
vertent, entrada
en vigur

1. Lescha davart las taglias communalas e davart las taglias da baselgia (LTCTB) dals 31 d'avust 2006

Art. 2 al. 3

La vischnanca po incassar ulteriuras taglias, sco spezialmain:

- a) ina taglia sin la part d'ierta ed ina taglia sin donaziuns;
- b) abolì
- c) abolì

Art. 22

abolì

Art. 23

abolì

² Cun l'entrada en vigur da la lescha qua avant maun vegn la lescha qua sutvart midada sco suonda:

2. Lescha da vischnancas dal chantun Grischun dals 31 d'avust 2006

Art. 9 al. 1 lit. c

approvar il preventiv ed il quint communal sco er fixar il pe da taglia respectivamain il pe d'ina taxa turistica che vegn eventualmain incassada;

³ La regenza fixescha il termin da l'entrada en vigur.

Agiunta I**Definiziuns**

En questa lescha signifitgeschan:

- a) *interpresas che stattan datiers dal turissem*: persunas giuridicas che profiteschon directamain u indirectamain dal turissem e che han lur sedia, lur administraziun effectiva u lur stabiliment da l'interpresa en ina vischnanca sco er persunas natirals cun activitad da gudogn independenta che han lur domicil, lur dimora fiscala, lur manaschi u lur stabiliment da l'interpresa en ina vischnanca e che na furneschan naginas prestaziuns dal sector d'alloschament.
- b) *interpresas d'alloschament*: persunas giuridicas che han lur sedia, lur administraziun effectiva u lur stabiliment da l'interpresa en ina vischnanca sco er persunas natirals cun activitad da gudogn independenta che han lur domicil, lur dimora fiscala, lur manaschi u lur stabiliment da l'interpresa en ina vischnanca e che furneschan principalmain prestaziuns dal sector d'alloschament.
- c) *persunas che na vivan betg da l'alloschament*: proprietarias e proprietaris, giudidras e giudiders sco er persunas cun dretg d'abitar da spazi d'abitar che sa chatta en vischnancas e che vegn dà – senza in'organisaziun professiunala – regularmain en locaziun cunter ina bunificaziun per intents da vacanzas u da recreaziun a persunas che n'han betg lur domicil fiscal u lur dimora fiscala en ina vischnanca.
- d) *persunas che dovran sezzas lur abitaziun*: proprietarias e proprietaris, giudidras e giudiders sco er persunas cun dretg d'abitar da spazi d'abitar che sa chatta en vischnancas, che vegn duvrà sez per intents da vacanzas u da recreaziun e che na constituescha per la proprietaria u per il proprietari, per la giudidra u per il giudider ubain per la persuna cun dretg d'abitar betg in domicil fiscal u ina dimora fiscala en ina vischnanca.
- e) *confamigliaras e confamgliars*: la conjugala u il conjugal, la partenaria registrada u il partenari registrà, la partenaria u il partenari da concubinat, ils geniturs, las tattas ed ils tats, ils uffants, ils fragliuns, lur conjugalas e lur conjugals sco er lur uffants. En l'obligaziun da pajar taglia vegnan las confamigliaras ed ils confamgliars represchentads da las persunas che dovran sezzas lur abitaziun. Premess che la noziun "persunas che dovran sezzas lur abitaziun" na vegnia betg designada autramain en questa lescha, cumpiglia ella tenor la litera d er las confamigliaras ed ils confamgliars.
- f) *organisaziun turistica*: sco organisaziuns turisticas valan organisaziuns per la gestiun da destinaziuns (OGD) sco er organisaziuns turisticas regiunalas (OTReg) che sa differenzieschan areguard lur incumbensas ed areguard lur grondezza. Ina OGD dispona d'in preventiv da marketing d'almain 4 fin 7 milliuns francs e cumpiglia la capacitad da letgs d'ina regiun turistica che permetta da

cuntanscher circa 2 milliuns pernottaziuns per onn en interpresas d'alloschament sco er en abitaziuns dadas en locaziun. Ina OTReg na sa preschenta betg senza sin il martgà, mabain surdà quella incumbensa – en ina furma adequata – ad ina OGD u ad in'otra organisaziun da marketing e metta a disposiziun almain 200 000 francs per quest intent.

- g) *spazi d'abitar*: mintga spazi che po vegnir duvrà per pernottaziuns u per dimoras. Latiers tutgan en spezial chasas, abitaziuns, stanzas, construcziuns moviblas, chamonas d'acla, chasas moviblas ch'èn postadas durablmain, plazzas stablas per tendas e per rulottas, lieus occupads permanentamain sin campadis e chaussas sumegliantas.
- h) *alloschi da gruppas*: interpresas d'alloschament, tar las qualas la gronda part da las stanzas ha dapli che 4 letgs u plazzas da dormir.
- i) *gudogn turistic*: per interpresas che stattan datiers dal turissem, per interpresas d'alloschament sco er per persunas che na vivan betg da l'alloschament: en spezial la pussaivladad da profitar da las cundiziuns generalas economicas che vegnan stgaffidas u meglieradas tras il turissem; e per persunas che dovràn sezzas lur abitaziun: en spezial la pussaivladad da profitar da l'infrastructura turistica e dals servetschs turistics.

Agiunta II**Tabella da branschas per interpresas che stattan datiers dal turissem e per interpresas d'alloschament**

Basa per calcular la part variabla: tariffas en promils da tut las entradas ch'èn suttamessas a la AVS (summa dals salaris tenor la AVS).

Tabella da branscha
Fatgs d'immobiglias
Bancas
Provediment d'energia e d'aua
Assicuranzas
Victualias e bavrondas, tubac
Telefericas
Telecommunicaziun senza posta
Interpresas d'alloschament
Traffic da viafier e traffic da lingia
Locaziun da mobiglias
Commerzi en detagl, reparatura
Ulteriur traffic da persunas
Interpresas da gastronomia
Biros da viadi
Servetschs che sa refereschan ad ina interpresa
Industria da construcziun e branschas parentadas
Commerzi a l'engrossa
Auas persas, dismessa da rument ed autras dismessas
Garaschas, tancadis
Fatgs d'instrucziun
Servetschs persunals
Industria da palpieri, da chartun, d'ediziun e da stampa
Sanadad e fatgs socials
Divertiment, cultura e sport
Industria (producziun da rauba)
Agricultura

Agiunta III**Tabella d'alloschament per interpresas d'alloschament e per persunas che dovran sezzas lur abitaziun**

Basa per calcular la part variabla: import en francs tenor la capacita dal gener d'alloschament respectiv.

Gener d'alloschament	Basas da calculaziun
Hotels	
La classa da confort 1	per chombra
La classa da confort 2	per chombra
La classa da confort 3	per chombra
La classa da confort 4	per chombra
Utilisaziun professiunala d'abitaziuns da vacanzas	surfatscha d'abitar netta (m ²)
Campadis	per parcella
Alloschis per gruppas	per piazza da durmir
Persunas che na vivan betg da l'alloschament	per chombra
Persunas che dovran sezzas lur abitaziun	surfatscha d'abitar netta (m ²)